

# AKASHVANI(AIR)

## RNU: KOLKATA

### Bengali Text Bulletin

28-04-2026

Time: 7.35 AM

#### বিশেষ বিশেষ খবরঃ-

১) রাজ্যে বিধানসভা নির্বাচনে দ্বিতীয়, তথা শেষ দফায় আগামীকাল ভোটগ্রহণ। এজন্য জোরকদমে চলেছে চূড়ান্ত প্রস্তুতি। সাতটি নির্বাচনী জেলায় সকাল সাতটায় ভোটগ্রহণ শুরু হবে।

২) প্রথম দফার ভোটের মতই দ্বিতীয় দফার বিধানসভা ভোট শান্তিপূর্ণ এবং সুষ্ঠু হবে বলে নির্বাচন কমিশন আশ্বাস দিয়েছে। ভোটের মুখে আইনশৃঙ্খলা রক্ষায় ২৬ জন আইপিএস এবং ডব্লিউ বি পি এস আধিকারিককে দেওয়া হচ্ছে অতিরিক্ত দায়িত্ব।

৩) মালদার মোথাবাড়িতে সাত বিচারককে হেনস্থার ঘটনায় ধৃত আইনজীবী মোফাক্করুল ইসলাম ও একরামুল বাগানীকে ১৪ দিনের জেল হেফাজতে পাঠানো হয়েছে।

৪) রাজ্যের বিভিন্ন জেলায় আজও দমকা হাওয়া সহ বৃষ্টির সম্ভাবনা।

৫) আইএসএল ফুটবলে ইস্টবেঙ্গল ওড়িশা এফসির বিরুদ্ধে খেলবে।

---

রাজ্যে বিধানসভা নির্বাচনে দ্বিতীয়, তথা শেষ দফায় আগামীকাল ভোটগ্রহণ। এজন্য জোরকদমে চলেছে চূড়ান্ত প্রস্তুতি। দ্বিতীয় দফার প্রচারাভিযান গত সন্ধ্যায় শেষ

হওয়ার পর শুরু হয় সাইলেন্স পিরিয়ড। আদপে সাতটি জেলা হলেও কলকাতা উত্তর ও দক্ষিণ মিলিয়ে মোট আটটি নির্বাচনী জেলায় আগামীকাল সকাল সাতটায় ভোটগ্রহণ শুরু হবে। ৩ কোটি ২১ লক্ষ ৭৩ হাজার ৮৩৭ জন ভোটার এই দফায় তাদের গণতান্ত্রিক অধিকার প্রয়োগ করবেন। এর মধ্যে মহিলা ভোটারের সংখ্যা ১ কোটি ৫৭ লক্ষ ৩৭ হাজারের কিছু বেশি। তৃতীয় লিঙ্গের ভোটার রয়েছেন ৭৯২ জন।

সুপ্রিম কোর্টের নির্দেশ মতো অ্যাপিলেট ট্রাইব্যুনালের তালিকা প্রকাশের পর এই সংখ্যা বদল হতে পারে। দ্বিতীয় দফায় প্রতিদ্বন্দ্বিতার আসরে রয়েছেন ১ হাজার ৪৪৮ জন প্রার্থী। মহিলা প্রার্থীর সংখ্যা ২২০ জন। আয়তনের নিরিখে সব থেকে বড় বিধানসভা কেন্দ্র কল্যাণী এবং সবচেয়ে ছোটো জোড়াসাঁকো।

অন্যদিকে, হুগলীর চুচুড়া বিধানসভার ভোটার সংখ্যা সর্বাধিক - ২ লক্ষ ৭৫ হাজার ৭১৫। সবচেয়ে কম ভোটার রয়েছে উত্তর ২৪ পরগনার ভাটপাড়ায় ১ লক্ষ ১৭ হাজার ১৯৫ জন।

মোট ২ হাজার ৩২১ কোম্পানী কেন্দ্রীয় বাহিনী, এই দফায় মোতায়ন করা হচ্ছে। পাশাপাশি থাকছেন ১৪২ জন সাধারণ পর্যবেক্ষক, ৯৫ জন পুলিশ পর্যবেক্ষক এবং ১০০ জন ব্যয় পর্যবেক্ষক।

দ্বিতীয় দফায় ৩৯ হাজার ৩০১-টি প্রধান ও ১ হাজার ৭-শো অক্সিলিয়ারি সহ মোট ৪১ হাজার ১-টি ভোটগ্রহণ কেন্দ্র খোলা হচ্ছে। এর মধ্যে শহরাঞ্চলে ১৪ হাজার ২১৮ এবং গ্রামাঞ্চলে ২৫ হাজার ৮৩-টি প্রধান ভোটগ্রহণ কেন্দ্র খোলা হচ্ছে। মহিলা পরিচালিত ভোটগ্রহণ কেন্দ্রের সংখ্যা ৮ হাজার ৮৪৫ -টি ২৯৮-টি মডেল ভোটগ্রহণ কেন্দ্র থাকছে। বিশেষভাবে সক্ষম ব্যক্তির ১৩-টি ভোটগ্রহণ কেন্দ্র পরিচালনা করবেন।

উল্লেখ্য, রাজ্যে প্রথম দফার নির্বাচনে গত ২৩শে এপ্রিল রেকর্ড ৯৩ দশমিক এক নয় শতাংশ ভোট পড়ে।

-----

রাজ্যে দ্বিতীয় দফায় ভোটগ্রহণ নিয়ে তৎপর নির্বাচন কমিশন। গোটা প্রক্রিয়া  
অবাধ, সুষ্ঠু ও নিরপেক্ষ রাখতে কমিশনের পক্ষ থেকে একগুচ্ছ পদক্ষেপ নেওয়া হচ্ছে।  
একটি প্রতিবেদন -

### ভয়েসকাস্ট অভিরূপ

-----

প্রথম দফার ভোটের মতোই পশ্চিমবঙ্গে দ্বিতীয় দফার বিধানসভা ভোট অবাধ  
শান্তিপূর্ণ ও সুষ্ঠু হবে বলে নির্বাচন কমিশন আশ্বাস দিয়েছে। রাজ্যের মুখ্য নির্বাচনী  
আধিকারিক মনোজ কুমার আগরওয়াল জানিয়েছেন, মানুষের মধ্যে ভোট দেওয়ার  
ব্যাপারে যে প্রবল আগ্রহ তৈরী হয়েছে তা তিনি জেলাসফরে প্রত্যক্ষ করেছেন। প্রথম  
দফায় প্রায় ৯৩ শতাংশ ভোটদানের হার এক নতুন মানদণ্ড তৈরি করেছে, এবং দ্বিতীয়  
দফায় অনেক জায়গাতেই মানুষ সেই হার ছাড়িয়ে যাওয়ার ইঙ্গিত মিলেছে। তিনি আরও  
বলেন, দ্বিতীয় দফায় আসন সংখ্যা কম ফলে এলাকা নিয়ন্ত্রণ বা 'এরিয়া  
ডমিনেশন' আরও কার্যকরভাবে করা সম্ভব হবে।

(বাইট- মনোজ আগরওয়াল)

-----

দ্বিতীয় দফার ভোটের প্রাক্কালে ওয়েব কাস্টিং ক্যামেরা ব্যবস্থাপনা ও তথ্য সংরক্ষণ  
নিয়ে রাজ্যের মুখ্য নির্বাচনী আধিকারিকের দপ্তর নতুন নির্দেশিকা জারি করেছে। গত  
সন্ধ্যায় জারি হওয়া নির্দেশে জানানো হয়েছে, ভোটগ্রহণ শেষ হওয়ার পর নির্দিষ্ট প্রক্রিয়া  
মেনে ক্যামেরা খুলে তা সংরক্ষণের ব্যবস্থা করতে হবে। একইসঙ্গে রিটার্নিং অফিসারদের

তত্ত্বাবধানে দ্রুত পোলিং পার্টিকে নির্ধারিত নিরাপত্তা বিধি মেনে রিসিভিং সেন্টারে পাঠানোর ব্যবস্থা করার নির্দেশ দেওয়া হয়েছে। পোলিং পার্টি বেরিয়ে যাওয়ার পর বুথে থেকে যাবেন বিএলও, ভিএবি কর্মী এবং পুলিশ বা কিউ ম্যানেজমেন্ট কর্মীরা। তাঁদের দায়িত্ব থাকবে ওয়েব কাস্টিং ক্যামেরার নিরাপত্তা নিশ্চিত করা।

নির্দেশে আরও বলা হয়েছে, সেক্টর অফিসারের উপস্থিতিতে ওয়েব কাস্টিং ক্যামেরা খুলে তা সংশ্লিষ্ট রিসিভিং সেন্টারে জমা দিতে হবে। পুরো প্রক্রিয়াটি নির্দিষ্ট নিয়ম মেনে সম্পন্ন করতে হবে বলেও স্পষ্ট জানানো হয়েছে। এই নির্দেশ কঠোরভাবে মেনে চলার কথাও বলেছে কমিশন।

-----

দ্বিতীয় দফার ভোটের মুখে ২৬ জন আইপিএস এবং ডব্লিউ বি পি এস আধিকারিককে বিভিন্ন পুলিশ জেলা এবং পুলিশ কমিশনারেটের আইন শৃঙ্খলা রক্ষার জন্য অতিরিক্ত দায়িত্ব দেওয়া হয়েছে। ডায়মন্ড হারবার পুলিশ জেলার জন্য আইপিএস সামির আহমেদ ও জর্জ অ্যালেন জন এবং ডব্লিউ বি পি এস আকাশদ্বীপ গেলটকে অতিরিক্ত দায়িত্ব দেওয়া হয়েছে। একইভাবে সুন্দরবন, বারুইপুর, বনগাঁ, বসিরহাট, রানাঘাট, বারাসত, কৃষ্ণনগর পুলিশ জেলা, হুগলি ও হাওড়া গ্রামীণ, চন্দননগর, ব্যারাকপুর, হাওড়া পুলিশ কমিশনারেট এবং পূর্ব বর্ধমানের জন্য অতিরিক্ত দায়িত্ব দিয়ে নিয়ে আসা হয়েছে উচ্চ পদস্থ পুলিশ আধিকারিকদের। রাজ্য পুলিশের তরফ থেকে জানিয়ে দেওয়া হয়েছে, আজ সকাল ১০ টার মধ্যে এই আধিকারিকরা নিজ নিজ এলাকায় পৌঁছে দায়িত্ব গ্রহণ করবেন।

-----

রাজ্য পুলিশের ডিজি সিদ্ধিনাথ গুপ্তার কার্যকালের মেয়াদ আরও ৬ মাস বাড়ানো হয়েছে। স্বরাষ্ট্রমন্ত্রকের আবেদনে সায় দিয়ে মন্ত্রিসভা নিয়োগ সংক্রান্ত কমিটি এই সিদ্ধান্ত নেয়। আগামী ৩০-শে এপ্রিল তাঁর অবসরগ্রহণের কথা ছিল। কিন্তু রাজ্যে ভোট প্রক্রিয়া চালু থাকায় ডিজি পদ ফাঁকা রাখা সম্ভব নয়। এত অল্প সময়ের মধ্যে নতুন ডিজি নিয়োগ করাও সমস্যার। সেই কারণে এই মেয়াদ বৃদ্ধি। এর ফলে রাজ্য পুলিশের কাজে আর কোনো বাধা রইলো না বলে মনে করা হচ্ছে।

---

আজকের প্রসঙ্গের এবারের বিষয় 'নতুন সরকারের কাছে মানুষের প্রত্যাশা'। রাত পোহালেই দ্বিতীয় দফার নির্বাচন, তার আগে সমাজের বিভিন্ন ক্ষেত্রের মানুষের সঙ্গে কথা বলে অষ্টাদশ বিধানসভা গঠনের পর নতুন সরকারের কাছে তাদের কি প্রত্যাশা জানতে চেষ্টা করেছেন আমাদের প্রতিনিধিরা।

আকাশবাণীর সংবাদ বিভাগ প্রযোজিত অনুষ্ঠানটি শুনবেন আজ রাত ৮টায় গীতাঞ্জলি, DTH বাংলা এবং আকাশবাণী সংবাদ কলকাতার সোশ্যাল মিডিয়া প্ল্যাটফর্মে।

---

মালদার মোথাবাড়িতে এস আই আরের কাজে যুক্ত সাত বিচারককে ঘেরাও করার ঘটনায় ধৃত আইনজীবী মোফাক্করুল ইসলাম ও এক্রামুল বাগানিকে ফের ১৪ দিনের জেল হেফাজতের নির্দেশ দিয়েছে কলকাতার বিশেষ এনআইএ আদালত। বিচারক সুকুমার রায় গতকাল এক নির্দেশে জানিয়েছেন, ১১ মে পরবর্তী শুনানির দিন এনআইএকে লিখিত রিপোর্ট দিতে হবে। এদিন জাতীয় তদন্তকারী সংস্থার আইনজীবী আদালতে জানান, এই দুই অভিযুক্তের বিরুদ্ধে যে সমস্ত তথ্য প্রমাণ পাওয়া গেছে সেই

শ্রেণিতেই তদন্ত করা হচ্ছে। তবে তা শেষ হতে আরো কিছুদিন সময় লাগবে। কেন্দ্রীয় সংস্থার দাবী মতোই এন আই এ হেফাজতের মেয়াদ বৃদ্ধি করেছে আদালত।

---

দ্বিতীয় দফা ভোটের আগে রাজ্যের বিভিন্ন এলাকায় থেকে অশান্তির খবর এসেছে।

উত্তর ২৪ পরগণার বীজপুর বিধানসভা কেন্দ্রে হালিশহর, খাসবাটি বোরায়ারিতলা এলাকায় এক তৃণমূল কংগ্রেস কর্মী গতরাতে গুলিবিদ্ধ হন। বাড়ি ফেরার সময়ে বছর ২৮ এর প্রসেনজিত মৌলিক ওরফে রাজাকে লক্ষ্য করে কয়েকজন দুষ্কৃতি গুলি চালায়। তার পেটে গুলি লাগে। আশঙ্কাজনক অবস্থায় কল্যাণীর জওহরলাল নেহরু হাসপাতালে তিনি চিকিৎসাধীন। মুখে মাস্ক থাকায় দুষ্কৃতিদের শনাক্ত করা যায়নি। এই ঘটনায় বিজেপির দিকেই অভিযোগ উঠলেও তা অস্বীকার করা হয়েছে।

এদিকে জেলার জগদলে তৃণমূল কংগ্রেস ও বিজেপির মধ্যে সংঘর্ষের ঘটনায় ধৃত চারজনকে পুলিশ গতকাল একদিনের জেল হেফাজতে পাঠায়। আজ তাদের ফের আদালতে তোলা হবে।

---

কলকাতা পুলিশের এসটিএফ চিৎপুর থানা এলাকার বি টি রোড থেকে প্রচুর আগ্নেয়াস্ত্র সহ এক ব্যক্তিকে গ্রেপ্তার করেছে। শামিম আলম নামে বিহারের নওদার বাসিন্দা বছর ৪০-এর ঐ ব্যক্তির কাছ থেকে তিনটি সিঙ্গল শর্টার, একটি সেভেন এমএম পিস্তল সহ প্রচুর কার্তুজ উদ্ধার হয়। ধৃতকে আজ আদালতে পেশ করা হবে।

---

রাজ্যের বিভিন্ন জেলায় গত দুদিন ধরে বিক্ষিপ্তভাবে বৃষ্টি হচ্ছে। আজও দক্ষিণবঙ্গের পূর্ব বর্ধমান, নদীয়া, দুই ২৪ পরগনা জেলায় দমকা হাওয়া ও বজ্র বিদ্যুৎসহ বৃষ্টির কমলা সতর্কতা রয়েছে। ঝোড়ো হাওয়ার গতিবেগ কোথাও ৫০ থেকে ৬০ কিলোমিটার পর্যন্ত হতে পারে। অন্যদিকে উত্তরবঙ্গের দার্জিলিং জলপাইগুড়ি কালিম্পং ও আলিপুরদুয়ার জেলায় ভারী বৃষ্টির সতর্কতা রয়েছে। মৎস্যজীবীদের আগামী শুক্রবার পর্যন্ত পশ্চিমবঙ্গ এবং সংলগ্ন উত্তর ওড়িশা উপকূলের দিকে যেতে নিষেধ করা হয়েছে।

এদিকে গত সন্ধ্যায় কলকাতা ও আশপাশের এলাকায় হালকা বৃষ্টি ও দমকা হাওয়া বয়ে যায়। গত দুদিন ধরে দিনের তাপমাত্রা কিছুটা কমলেও সর্বনিম্ন তাপমাত্রা স্বাভাবিকের বেশি রয়েছে। আলিপুরে আজ সর্বনিম্ন তাপমাত্রা রেকর্ড করা হয়েছে ২৮ দশমিক ৫ ডিগ্রি সেলসিয়াস, স্বাভাবিকের থেকে দুই দশমিক তিন ডিগ্রি বেশি।

-----

আই এস এল ফুটবলের ম্যাচে আজ ইস্টবেঙ্গল, ওড়িশা এফ সির বিরুদ্ধে খেলবে। সল্টলেকের যুবভারতী ক্রীড়াঙ্গনে খেলা শুরু হবে সন্ধ্যা সাড়ে সাতটায়। ৮ ম্যাচে চারটিতে জয়, তিনটি ড্র ও এক ম্যাচে পরাজিত হয়ে ১৫ পয়েন্ট সংগ্রহ করে ইস্টবেঙ্গল লিগ তালিকায় ষষ্ঠ স্থানে রয়েছে।

অন্যদিকে, সমসংখ্যক ম্যাচ খেলে একটিতে জয়, তিনটিতে ড্র ও চারটিতে পরাজিত হয়ে ৬ পয়েন্ট সংগ্রহ করে ওড়িশা লিগ তালিকায় ত্রয়োদশ স্থানে রয়েছে।

-----